

БӨЛІМ: МҰҚАҒАЛИ МАҚАТАЕВ / ӨЛЕҢДЕР

Бәріне жауаптымын

ЖАРИЯЛАНДЫ
22.01.2023ТІРЕК СӨЗДЕР
Мұқағали МақатаевСІЛТЕМЕ
<https://bilimger.kz/129678/>

БӘРІНЕ ЖАУАПТЫМЫН

Бәріне жауаптымын.

Қашан менен қалғалы тағат, тыным,

Пісіп тұрған егінді бұршақ ұрса,

Айтыңдар жауапты кім?

Әрине, мен.

Мен оған жауаптымын.

Бүгінгі сәт, кешегі ағаттығым,

Салғырттықпен өткізген салақ күнім.

Сыртылдаған босқа өтсе сағат тілі,

Оған да жауаптымын, жауаптымын.

Біреу кессе орманның тірі ағашын,

Жауап бермей қалайша тұра аласың.

Қарындасым алдыма жылап келсе,

Тік тұрып жауап берер мына басым.

Бұл шақта текті кімдер, тексіз кімдер,

Көрсоқырлар қаншама көпті күндер.

Дос адамдар өзара жауласса егер,

Ол да менің кінәмнен деп біліңдер.

Қол сынса, бас жарылса, қанап мұрын,

Ол да — менің сорақы ағаттығым.

Ар сотының алдына алып барып,

Алдымнан есігін аш абақтының!

Себебі, бәріне мен жауаптымын!

Мұқағали Мақатаев

© 2026 Bilimger.kz Ақпараттық-танымдық білім порталы. Барлық мазмұн авторлық құқықпен қорғалған.